


Opinion dividi riba resultado Caiso & Soca Monarch



ORANJESTAD(AAN): Sin duda dos di e figuranan mas importante den e festival di Calypso y Roadmarch tabata Claudius Philips y Antoni Gario. Cu tempo a cambia e organisadonan y awe e evento yama Caiso & Soca Monarch, pero cu un generacion nobo di cantante, hopi bes e mesun famia di e generacion prome. Sinembargo, algun rato despues cu a conoce e Reynan di Caiso & Soca Monarch 2015, mesora a nota comentarionan riba red social. Asina e conocido Antoni Gario di e banda Le Groove (Pink for Life) a skirbi cu e resultado no ta locual su grupo y fanaticonan a spera. Especialmente pasobra nan ta sinti cu nan cantante “Blacky” a dal duro y a conta cu tremendo respaldo di publico den Carnival Village. Antoni Gario a bisa den otro rosea cu e no ta sorprende cu Bradley (Easy B) a gana e festival di Soca. El a yega na e conclusion ey mirando e forma straño con e huradonan ta husga cada cancion. E ta sinti cu ta e tipo di cosnan asina ta e motibo dicon e festival ta unda e ta awendia, den cual e ta conta cu menos atencion di publico, si compara cu antes. Na final Gario ta insisti cu e tin masha gana di haya e criteriannan cu e huradonan ta aplica pa husga e cantantenan.

Di otro banda, Claudius Philips di OREO, contento cu e resultado den cual su yiu homber, Shaun Philips, conoci como “Mighty Talent Jr.”, a sa di retene su titulo di Rey di Caiso. Riba su pagina di Facebook, el a skirbi cu nan a cambia number di e festival y cu Easy B a bisa nan cu si ta Soca nan kier, cu ta Soca nan lo haya....bo a presenta y gana! Claudius Philips a felicita su mesun yiu Shaun, na Blacky, tur otro finalista y sin lubida e banda Tsunami pa nan respaldo musical na e Rey di Soca. E reaccionnan obviamente ta hopi diferente for di otro, demostrando cu ainda hopi facil ora no gana, mesora ta cuestiona huradonan pa nan forma di husga. Ta mesun situacion a presenta despues di e festival di Tumba, den cual tambe un parti di e publico no a keda contento cu e resultado final. Historia sinembargo a siña nos cu hopi bes huradonan ta husga pa areglo y presentacion, mientras cu publico ta scoge su mesun favorito riba caya. Den mayoria caso, e scogencia di publico den forma di e “Road Jam” casi nunca ta mesun cos cu locual e huradonan a husga den stadion. Laga nos mira kico publico, carnavalistanan y DJnan di radio lo dicidi e aña aki.